



POLITIDIREKTORATET	
06 MARS 2017	
Arkiv 08-18	Arkivkode 011.2
Saksnr 16/4891	Dok.nr 19

**Ordfører**

**Politidirektoratet**  
Postboks 8051 DEP  
0031 OSLO

Vår ref.: 13/317-33/ MAS  
L.nr.: 17/1327  
Dykkar ref.:  
Arkiv: K2 - X31  
Dato: 03.03.2017

## Klage Politireform/Nærpolitireform

### Kva saka gjeld:

Politidirektoratet si avgjerd for kommunar som blir råka av ny tenestestruktur kan påklagast til justis- og beredskapsdepartementet i medhald av forskrift 2016-06-22-815. Frist for å klage er sett til 10. mars 2017.

Klaga skal vere skriftleg og grunngjevast, og skal seie noko om kva endringar i avgjerda som kommunen ønskjer eller om kommunen ønskjer avgjerda heilt eller delvis oppheva på grunn av tilhøve ved sakshandsaminga.

### Fråsegn:

Hyllestad kommune har saman med nabokommunane, Fjaler og Askvoll, deltatt aktivt i prosessen med politireforma. Kommunane har lenge sett at dagens organisering ikkje er fullverdig eller god med tanke på innbyggjarane sin tryggleik. Særleg knyter dette seg til vakt og beredskap utanom lensmannskontoret si opningstid. Som i mange andre små kommunar med store avstandar til politiet si lokalisering for vakt og beredskap, opplever vi eit fråverande politi på ettermiddag, kveld, natt, helg og høgtid. Vi ser også at lokale lensmannskontor kan verte sårbare ved sjukdom og ferieavvikling. Av den grunn har vi hatt ei konstruktiv, open og positiv haldning til Politireforma/Nærpolitireforma. Vi har sett den som ei mogelegheit til forbetring, og har lagt stor vekt på å spele på lag.

Vest politidistrikt har følgd opp kravet til informasjon til- og dialog med kommunane, og har synt velvilje til å møte kommunane også utanom dei faste styringsgruppemøta som har vore.

Kommune Askvoll, Fjaler og Hyllestad har opplevd eit godt samarbeid med lokale lensmenn i regionen (Askvoll, Fjaler, Hyllestad og Førde) og Vest Politidistrikt gjennom prosessen. Vi har vore samde om at vi kan slå saman dei 3 lensmannskontora vi har i dag, dersom vi får ei betre vakt og beredskapsordning gjennom heile døgnet.

Hyllestad kommune meiner dialog med vår lokale lensmann er særskilt viktig og at tenestepersonellet som skal operere i kommunen må kjenne kommunen godt. Derfor er stabilitet i personellet som skal jobbe i kommunen viktig. Vert det for mange personar som skal operere i kommunen utifrå

eit større vakt-distrikt enn dei tre kommunane, er vi uroa for å politiet vil vere godt nok kjent i kommunen med dei negative konsekvensar det har for førebygging mm.

Hyllestad kommune finn ikkje grunn til å klage på prosessen som har vore eller organiseringa av framtidig struktur, gitt at føresetnadane som kjem fram i klagen vert teke omsyn til.

Når vi likevel vel å klage er det grunngjeve med uro kring vakt og beredskap og innhaldet i det nye lensmannskontoret lokalisert til Dale/Fjaler.

#### Mobil løysing:

Kollektivtilbodet mellom Hyllestad og Dale er svært avgrensa og heng ikkje saman med bussruter frå krinsane i store deler av døgnet. Frå deler av kommunen er det berre mogleg å nytte kollektivtilbod i samband med skulerute medan i deler av kommunen er det ikkje reelt kollektivtilbod til Dale. For dei fleste i kommunen vil det ta ca 45 minutt med bil til Dale, medan for nokre til det ta lengre tid.

Til Førde tek det ca 75 minutt.

**Av den grunn ber Hyllestad kommune om at kommunen får tilgang til mobil løysing med ein kontordag i kommunen, tilsvarande Askvoll kommune, for å løyse utfordringane med avgrensa kommunikasjon og avstand.**

#### Vakt og beredskap:

Vi ser ikkje ut frå den nye organiseringa eit tydeleg pålegg om at vakt og beredskap skal bli vesentleg betre enn dagens organisering. Vaktsamarbeidet i tenesteeininga ser ut til å bli vidareført som i dag, men med færre tenestestadar. Med dette som utgangspunkt har vi erfaringar som tilseier at vår kommune/region også i det vidare vil få mangelfull vakt og beredskap utanom kontortid.

Intensjonen i Nærpolitireforma er at vi skal kunne forvente eit meir synleg og tilgjengeleg politi også ute i distriktskommunane.

Vi vil minne om at driftseininga Sunnfjord er svært stor i utstrekning og har krevjande geografi. Avstanden til tenestestaden Førde og til andre tenestestadar innanfor eininga er så stor at vi ikkje ser korleis krava til responstider kan bli innfridd for vår del. Den einaste tenestestaden som delvis kan nå våre innbyggjarar innan responstidskrava er Dale. Vi opplever innhaldet som lite forpliktande for kommunar og område som fell utanom 90% kravet. Vi har ei reell uro for at vår kommune og regionen vil bli ein del av den 10% som ikkje vil oppleve forbetringar med den nye organiseringa av tenestestadar og tenesteeiningar. Dersom det einaste vi oppnår er å slå saman dei 3 lensmannskontora, finn vi stor grunn for å klage på den nye organiseringa.

Elles vil kommunen understreke at responstida på kveldstid og helgedagar ikkje har vore tilfredsstillande slik det er i dag med hovudvekta av respons frå Førde.

**Hyllestad kommune opprettheld kravet om heildøgns vakt og beredskap innanfor regionen Askvoll, Fjaler og Hyllestad.**

**Vi opprettheld kravet om at tenestestaden Dale får utgjere eit eige vaktområde.**

Vi understrekar følgjande tekst:

*Politikontaktene ved tjenesteenhetene eller beredskapskontakten ved de nye geografiske enhetene vil få i oppdrag å utarbeide lokale planer for hvordan politipatruljen raskt kan ta seg frem til steder med vanskelig tilkomst, slik at målene for responstid opprettholdes. Fra politimesteren sin side er det en forutsetning at politiet sine lokale beredskapsplaner som angår kommunene blir presentert i de nye politirådene, og videre at politiet lokalt følger opp samarbeid med lokale beredskapsaktører.*

Hyllestad støtter opprettinga av politikontaktar med særleg ansvar for å kontakt mot einingane i kommuneadministrasjonen, samt politiråd i kvar kommune med fokus på mellom anna arbeid med beredskap og førebygging.

Med helsing

Morten Askvik  
Ordførar

Telefon: 57789505